

《若是去關仔嶺》

若是去關仔嶺
著愛去阿媽出世的日本宿舍
聽 溫泉水恬恬仔流過警光山莊
看 田嚶恰烏肚娃(kuai)仔咧相借問
笑 毛蟹恰溪哥仔咧耍覷相揣

若是去關仔嶺
著愛去大凍山跤舅公仔的田園踏草青
摸 懸懸的青仔欖
看 樹頂有青青黃黃的檳榔
食 芳芳的甕缸雞
配 酸酸甜甜的椪柑恰柳丁

若是去關仔嶺
著愛行過『好漢坡』去嶺頂公園散步
聽 吳晉淮「關子嶺之戀」咧放送
講 嶺頂春風吹微微 滿山花開正當時
蝴蝶多情飛相隨 阿娘仔對阮有情意

若是去關仔嶺
著愛揀肉粽節的時陣
日時蟬仔恰鹿角龜佇『光臘樹』唱歌對看
暗暝火金姑閃閃爍爍佇竹林仔內咧戀愛
猶有暗公鳥陪伴啼叫

若是去關仔嶺
著愛順繼去水火洞恰碧雲寺
趁秋天樹葉抹黃轉紅的時陣
躡過磅空剗到聽水廳
浸佇燒燒滑溜的溫泉水
阮爽快甲若親像水牛歡喜咧膏(kō)浴
關仔嶺真正是「頂港有名聲，下港上出名」的好所在